

**TEKS UCAPAN
YANG BERBAHAGIA
DATUK PROFESOR DR. SHAHRIN
SAHIB@SAHIBUDDIN, FASc**

**NAIB CANSELOR
UNIVERSITI TEKNOLOGI MARA**

SEMPENA

**MAJLIS MENANDATANGANI
MEMORANDUM PERSEFAHAMAN**

**ANTARA
JABATAN PERANCANGAN BANDAR DAN DESA
(PLANMalaysia)**

**DAN
UNIVERSITI TEKNOLOGI MARA**

20 FEBUARI 2024 | 8.30 PAGI

**ARAS 7, CANSELORI
UNIVERSITI TEKNOLOGI MARA**

YBrs. TPr Dr. Alias bin Rameli
Ketua Pengarah Perancangan Bandar dan Desa
Jabatan Perancangan Bandar dan Desa
(PLANMalaysia)

YBrs. TPr Hj. Hassan bin Yaakob
Timbalan Ketua Pengarah (Pembangunan)
Jabatan Perancangan Bandar dan Desa
(PLANMalaysia)

YBrs. Prof. TPr Dr. Jamalunlaili Abdullah
Penolong Naib Canselor
Kolej Pengajian Alam Bina

Ketua Pengajian Perancang Bandar dan Senibina
Landskap, UiTM Puncak Alam

Ketua Program Perancangan Bandar dan Wilayah,
Jabatan Pengajian Alam Bina dan Teknologi, Kolej
Pengajian Alam Bina UiTM Seri Iskandar

Pegawai-pegawai PLANMalaysia

Para pensyarah Program Perancangan Bandar dan
Wilayah, Kolej Pengajian Alam Bina, Universiti Teknologi
Mara

Pegawai-pegawai PLANMalaysia

Tuan-tuan, Puan-puan yang saya hormati sekalian.

Assalamualaikum WBT, Salam Sejahtera dan Salam Malaysia MADANI.

1. Terlebih dahulu, marilah kita memanjatkan setinggi-tinggi kesyukuran ke hadrat Allah SWT, kerana dengan rahmat dan izin-Nya kita dapat bersama-sama di Majlis Menandatangani Memorandum Persefahaman (MoU) antara Jabatan Perancangan Bandar dan Desa (PLANMalaysia) dengan Pihak Universiti Teknologi MARA melalui Pengajian Perancangan Bandar dan Senibina Landskap, Kolej Pengajian Alam Bina.

2. Kami di UiTM, merakamkan ucapan terima kasih dan penghargaan kepada pihak PLANMalaysia di atas kesudian dalam menjalinkan kerjasama ini.

Para hadirin yang saya hormati sekalian.

3. Jabatan Perancangan Bandar dan Desa (PLANMalaysia) memang satu nama yang tidak asing lagi di Malaysia. Peranan PLANMalaysia cukup besar di dalam perancangan bandar dan desa ke arah

kesejahteraan rakyat, perancangan spatial yang komprehensif dan kemakmuran negara.

4. Tertubuhnya UiTM sebagai sebuah institusi pengajian awam yang menitikberatkan pendidikan dan ilmu pengetahuan sejak 67 tahun dulu, boleh dikatakan sama penting di dalam melengkapi kehendak pembangunan dengan melahirkan graduan bumiputera yang bakal mengurus pembangunan yang disasarkan.

5. Pendek kata, PLANMalaysia dan UiTM saling lengkap melengkapi antara satu sama lain di dalam melaksanakan tanggungjawab penubuhan masing-masing. PLANMalaysia di bawah tanggungjawab Kementerian Pembangunan Kerajaan Tempatan menyediakan aspek fizikal perancangan dan Pembangunan, manakala UiTM menyediakan aspek pengurusan kognitif dan intelektual bagi kawasan bandar dan desa oleh PLANMalaysia. UiTM telah menjalinkan kerjasama melalui MoU dan MoA bersama pelbagai agensi antarabangsa dan di dalam negara. Justeru, kami tidak mahu ketinggalan untuk menjalinkan

kolaborasi bersama PLANMalaysia, yang mempunyai cemerlang dari sudut perancangan dan pembangunan negara.

Hadirin sekalian,

6. UiTM telah memulakan tapak penubuhannya di Jalan Othman, Petaling Jaya pada tahun 1956 melalui Sekolah Latihan Teknikal di bawah RIDA (*Rural & Industrial Authority*), yang kemudiannya diambil alih oleh MARA sejak 1965 yang dikenali sebagai Institut Teknologi MARA. Kampus pertama ITM di Bandaraya Shah Alam telah menjadi batu asas penubuhan UiTM yang kini, mempunyai cawangan seluruh negara dan melahirkan graduan di dalam pelbagai profesion pekerjaan.

7. MoU ini merupakan satu manifestasi bagi menjalinkan kerjasama dalam bidang akademik, penilaian, penyelidikan dan latihan di dalam bidang perancangan bandar. Kami yakin, dengan adanya PLANMalaysia sebagai rakan kerja strategik, kita dapat

sama-sama melaksanakan aspirasi kerajaan untuk bergerak ke arah teknologi mampan, berdaya saing dan inovatif serta melahirkan masyarakat madani. Seterusnya, memperkukuhkan lagi kerjasama untuk kepentingan bersama di antara pihak universiti dengan industri di dalam bidang pengajian akademik dan perancangan bandar sesuai dengan perkembangan pesat dunia teknologi dan penyelidikan.

8. Jalinan kerjasama ini merangkumi pelaksanaan aktiviti berbentuk akademik dan amali yang melibatkan aspek penyelidikan serta perundingan khususnya dalam bidang perancangan bandar, pengurusan bandar, sosioekonomi bandar, pelancongan, perancangan pengangkutan, perancangan komuniti dan kemudahan kemasyarakatan serta percambahan idea Baharu.

9. Justeru, pihak UiTM menyambut baik hubungan kerjasama ini, selaras dengan inisiatif dan objektif Plan Strategik UiTM 2025 dalam memperkukuhkan jalinan dan hubungan di antara industri dan alumni. UiTM melalui Pelan Strategik UiTM 2025 yang bertemakan

Unleashing Potentials, Shaping the Future atau **Menyerlahkan Potensi, Membentuk Masa Hadapan** adalah satu pelan untuk menjadikan UiTM sebagai sebuah universiti dikenali dunia yang sudah pasti memerlukan sokongan daripada semua termasuk pihak industri.

10. Diharapkan, perjanjian persefahaman antara UiTM dan PLANMalaysia ini, dapat menggiatkan lagi aktiviti yang dirancang dan sama-sama sentiasa bersedia memberikan kerjasama yang berpanjangan. Pasti persefahaman yang dibentuk ini juga, mampu memberi impak yang berkesan kepada pembinaan ilmu dan juga kepada masyarakat keseluruhannya.

11. Akhir kata, sekali lagi ribuan terima kasih diucapkan kepada pihak PLANMalaysia serta para hadirin. Semoga majlis pada petang ini mendapat rahmat daripada Allah SWT.

Sekian.

**Wabillahitaufik Walhidayah Wassalamualaikum
Warahmatullahi Wabaraktuh.**